



Las relaziuns tranter il Grischun ed il Vnuost

Oz preschenta il LIR las Vals lateralas dal Vnuost che mainan vers il Grischun.

7



südostschweiz

LA QUOTIDIANA

Redacziun: Via Sommerau 32, 7007 Cuir, tel. 081 255 57 10, redacziun@laquotidiana.ch

Cun dapli optimissem

■ (anr/ac) La partenza ella sesiun da skis ei gartegiada in bionton meglier ch'ils onns vargai. Denter Nadal e Daniev han dus gis da bialaura procurau per fetg bunas frequenzas. La sesiun da skis gest lantschada ha confirmau in trend semusaus dapi entgins onns. Ei la neiv avon maun e tarlisch il sulegl vegnan ils skiturs en roschas. Il cass ei quei stau il 29 e 31 da december nua che las pistas sursilvanas ein stadas fetg bein frequentadas. La partenza

ella sesiun procura per megliera luna tiels responsabels dallas pendicularas. Negin smarvegl visavi allas partenzas dils onns vargai. Actualmeins crescha la cozza da neiv vinavon els aults. En certas regiuns sco sisum la Surselva en tala abundanza ch'il prighel da lavinas ei s'augmentaus considerabel. La viafier sur l'Alpsu ei aunc adina serrada ed el Valleis ein divers loghens momentan buc accessibels.

> PAGINA 4

Senza ina solia cuntervusch

■ (anr/gns) In interess immens per la radunanza da nominaziun da la pps grischuna per las elecziuns da la regenza e dal cussegl grond. Cun 160 vuschs e naginas cuntervuschs han ils delegads e las delegadas nominà Walter Schlegel sco candidat per la regenza. Da preschent è l'um da 55 onns cumandant da la polizia chantunala ed el duess esser ina ferma pitga per la regenza, ha ditg Heinz Brand, il president da la

pps grischuna. El saja ina persunalitad cun blera experienscha da star avant a gremis da tut gener. Augmentar vul la pps da noss chantun er il dumber da deputads e deputadas (da preschent nov dels) e per quel intent è fin ussa gia enconuschentas 21 persunas. Duas da quellas èn per exempel Gabriella Binkert e Renatus Casutt.

> PAGINA 2

Premi naziunal per Origen

Premi Wakker 2018

DA GION NUTEGN STGIER / ANR

■ Onur per l'Origen Festival Cultural cun ses intendant Giovanni Netzer. La Nova Fundaziun Origen survegn da la Protecziun da la patria il Premi Wakker 2018. Excezzionalmain surdat l'organisaziun svizra quel premi ad ina instituziun e na ad ina vischnanca. Cun esser deditgà il 2018 a l'Onn dal patrimoni cultural fa la Protecziun da la patria ina excezzion cun surdar il Premi Wakker. Surda vegn quel dapi il 1972 e quai adina ad ina vischnanca. Ina excezzion è stada il 2005 cun avair las Viafiers federalas svizras l'onur da retschaiver quel premi da muntada naziunala. Per il premi 2018 ha la giuria danovamain fatg ina excezzion e decidì da surdar il premi dotà simbolicamain cun 20 000 francs a la Nova Fundaziun Origen a Riom. Cun surdar la Protecziun da la patria il premi ad Origen survegn per l'emprima giada in'organisaziun da la societad civila il premi cun ina valur nunpajabla e da renum naziunal. Il premi saja bain da fitg gronda valuta



La Villa Carisch a Riom è il datgasa da l'Origen Festival Cultural. Il mantegniment da quel bajetg istoric è er ina raschun che la Protecziun da la patria surdat il Premi Wakker 2018 ad Origen.

FOTO B. HOFER

per Riom, per Surses e per Origen, ha ditg Giovanni Netzer, dentant saja el er da gronda impurtanza per il Grischun cun sia

cultura multifara. Per il svilup dal festival, da la vischnanca da Riom ed er dal turissem e da l'economia regionala saja il premi bler dapli

che be ina reconuschentscha, ha punctuà Netzer.

> PAGINA 5



Nominà unanim ha la pps grischuna Walter Schlegel per la regenza grischuna.

FOTO TH. GSTÖHL

Guido Mittner è il nov president dal Tour de Ski

■ (rtr) Il comité d'organisaziun dal Tour de Ski è cumplet. Guido Mittner, oriund Jauer, è vegnì elegi sco president. L'ocurrenza l'emprim da schaner 2019 ha definitivamain lieu en la Val Müstair. A l'entschatta da december aveva Clà Filip Pitsch desditg sia piazza. Tras quai era l'avegnir dal Tour de Ski en la Val Müstair tuttenina intsichert. Il vitg da Val Müstair aveva però signalisà cleramain da vulair proseguir cun il Tour de Ski. Per la Val Müstair è quella cursa in'impurtanta occurrenza per sa posiziunar sco regiun da passlung, oravant tut era perquai che la Val Müstair è la patria dals curridurs Gianluca e Dario Colonna. Sin Mittner spetga ussa blera lavur. Per in vitg da radund 1400 abitantas ed abitants sa tracta tar in tal event dad ina gronda sfida organisatorica e logistica. Actualmain saja il comité d'organisaziun vidlonder da tractar sch'ins vul organisar ina u duas etappas. Il comité d'organisaziun è cumplet ed il Tour de Ski ha definitivamain lieu en la Val Müstair il prim da schaner 2019.

Giubileum e grond project

75 onns Secziun da catschadurs Vallatscha Medel/Lucmagn

DA HANS HUONDER / ANR

■ La fin d'jamna festivescha la Secziun da catschadurs Vallatscha il giubileum da 75 onns. Parallelmein lavura ella vid il project per in stan da sittar niev. La festivatad da giubileum a Curgaglia ei cumbinada cun in pro-

gram da rama. Spel divertiment porscha la secziun in referat da cusseglier guvernativ Mario Cavigelli davart il luf. Egl onn da giubileum stat il project per in stan da sittar sur la distanza da 150 m el center. «La damonda da baghegiar ei fatga, nus sperein che nus sappien realisar il stan», di il pre-

sident Ursin Venzin. Per el penda igl avegnir dalla secziun empauer vid quei project: «Sche nus stuein serender ordeifer la Val a sittar maunca ina part dall'identificaziun dallas commembras e dils commembers cun la secziun.»

> PAGINA 3



Fotografia da temps passai: Catschadurs da Medel cun lur preda.

MAD

Documentà la renovaziun d'una chasa engiadinaisa

■ (anr/afi) L'on passà han renovà ils conjugals Arquint lur chasa engiadinaisa a Scuol Sot. Quistas lavuors e la fascinaziun per chasas engiadinaisas han inspirà a Jürg Arquint da documentar tuot la renovaziun. Resultà es ün cudesch da 148 paginas cun passa 100 fotografias chi raquinta giust'ei l'istorgia da la famiglia Arquint. Illa chasa a Porta 17 abitai-

van fingià il bazegner e la nona e'ls genituors da Jürg Arquint. El svesa ha passantà si'infanzia a Turich e contuorns. Dürant il temp da vacanzas rivaivan ils Arquints adüna darcheu a Scuol Sot. Pro la renovaziun da lur chasa han els mantegnü la substanza e las structuras caracteristicas da la chasa.

> PAGINA 8



Servetsch d'abunents e da distribuziun: tel. 0844 226 226 mail: abo@somedia.ch